



REPUBLIKA E SHQIPËRISË
AUTORITETI I KOMUNIKIMEVE ELEKTRONIKE DHE POSTARE
KËSHILLI DREJTUES

Nr. 1623 Prot.
16

Tiranë, më 16.7.2024

V E N D I M

Nr. 19, datë 16.07. 2024

MBI

**“SHQYRTIMIN E ANKIMIT ADMINISTRATIV TË SIPËRMARRËSIT TË
KOMUNIKIMEVE ELEKTRONIKE “ALBANIAN SATELLITE
COMMUNICATIONS” SH.P.K, KUNDËR VENDIMIT TË NDËRMJETËM”**

Këshilli Drejtues (KD) i Autoritetit të Komunikimeve Elektronike dhe Postare (AKEP),
me pjesëmarrjen e:

Z.	Tomi	Frashëri	Kryetar
Znj.	Edlira	Dvorani	Anëtar
Z.	Lorenc	Bako	Anëtar
Z.	Bleron	Dokle	Anëtar
Z.	Armer	Juka	Anëtar

dhe sekretare Znj. Evblina Taçi, në mbledhjen e datës 16.07.2024, sipas procedurës së përcaktuar në Ligjin Nr. 9918, datë 19.05.2008, “Për Komunikimet Elektronike në Republikën e Shqipërisë” i ndryshuar, Rregulloren e Brendshme për “Funksionimin e Këshillit Drejtues të Autoritetit të Komunikimeve Elektronike dhe Postare”, miratuar me Vendimin Nr. 7, datë 16.02.2017, të Këshillit Drejtues, e ndryshuar si dhe Ligjin Nr. 8480, datë 27.05.1999 “Për funksionimin e organeve kolegjiale të administratës shtetërore dhe enteve publike”, me propozim të komisionit *ad hoc* shqyrtoi çështjen me objekt:

- *Shqyrtimi i ankimit administrativ të sipërmarrësit të komunikimeve elektronike “Albanian Satellite Communications” sh.p.k, kundër vendimit të ndërmjetëm.*

BAZA LIGJORE:

1. Neni 128 e vijues i Ligjit nr. 44/2015, datë 30.04.2015, “Kodi i Procedurave Administrative i Republikës së Shqipërisë” (**ligji nr. 44/2015**);
2. Neni 132 e vijues i Ligjit nr. 9918, datë 19.5.2008, “Për Komunikimet Elektronike në Republikën e Shqipërisë”, i ndryshuar (**ligji nr. 9918/2008**);
3. Ligji nr.10433, datë 16.06.2011 “Për Inspektimin në Republikën e Shqipërisë” (**ligji nr. 10433/2011**);
4. Rregullore Nr. 46, datë 27.10.2016, “Metodika e inspektimit të veprimtarisë së sipërmarrësve të rrjeteve dhe të shërbimeve të komunikimeve elektronike”, miratuar me Vendimin Nr. 2695, datë 27.10.2016, të Këshillit Drejtues; (**Rregullore nr. 46/2016**).

K Ë SHILL I D R E J T U E S:

Nga shqyrtimi i materialit shkresor, të përbërë nga:

1. Ankimi administrativ i sipërmarrësit Albanian Satellite Communications sh.p.k, i datës 26.06.2024, protokolluar në AKEP me shkresë nr.1623/1, datë 26.06.2024);
2. Opioni i komisionit *ad hoc*, ngritur me urdhrin nr.100, datë 28.06.2024, “Për ngritjen e komisionit *ad hoc* për shqyrtimin e ankimit administrativ të sipërmarrësit “Albanian Satellite Communications sh.p.k”;
3. Projekt-Vendimin e formatuar dhe arsyetuar;
4. Relacionin shoqërues të Projekt-Vendimit, i hartuar nga Komisioni *ad hoc* i ngritur për shqyrtimin e ankimit administrativ (Relacioni);
5. Praktikën e plotë të inspektimit, e cila përmban materialet si vijon: Autorizimin e Inspektimit Nr. 1623 Prot, datë 18.06.2024; Procesverbalin e Inspektimit nr.35, datë 21.06.2024, Vendim i ndërmjetëm datë 21.06.2024 “Masë Urgjente për zhbllokimin e menjëhershëm të faqes web “Prapaskena.com” si dhe të çdo faqe tjetër të bllokuar”.

Si dhe duke iu referuar diskutimeve në mbledhje mbi çështjen, dhe bazës ligjore të sipërcituar,

V Ë R E N:

I. Vlerësimi Paraprak:

1. Pas shqyrtimit të ankimit administrativ të sipërmarrësit të komunikimeve elektronike “Albanian Satellite Communications” sh.p.k, kundër vendimit të ndërmjetëm, të vendosur nga inspektorët e AKEP (GI), Këshilli Drejtues i AKEP konstatoi se sipërmarrësi në fjalë legjitimohet për të paraqitur ankim administrativ pasi paraqet *prima facie* interes në këtë procedurë, bazuar në nenin 136, të **ligjit nr.9918/2008**.
2. Sipërmarrësi ankimues ka paraqitur ankimin administrativ brenda afatit të parashikuar në nenin 136, të **ligjit nr. 9918/2008**, në nenin 44, të Ligjit nr. 10433, datë 16.06.2011 “Për inspektimin në Republikën e Shqipërisë”, si dhe pikës 3.6 të Rregullores Nr. 46 datë 27.10.2016, “Metodika e Inspektimit të Veprimtarisë së Sipërmarrësve të Rrjeteve dhe të Shërbimeve të Komunikimeve Elektronike” si dhe ankimi administrativ plotëson efektivisht të gjitha kushtet formale për pranimin e **shqyrtimit të ankimit**, të parashikuara në nenin 135 të Kodit të Procedurave Administrative të Republikës së Shqipërisë.

II. Rrethanat e Çështjes:

1. Me Autorizimin e Inspektimit Nr. 1623 Prot, datë 18.06.2024, Kryetari i Këshillit Drejtues të AKEP, ka urdhëruar kryerjen e inspektimit të sipërmarrësit “Albanian Satellite Communications” sh.p.k, për periudhën 19.06.2024 deri më 21.06.2024. Inspektimi i subjektit “Albanian Satellite Communications” sh.p.k, me nr. NIPT: K62115018I u krye me tematikë si më poshtë:

Verifikimi i informacionit në lidhje me ankesën e bërë publike në një prej portaleve mediatike shqiptare (Prapaskena.com), e cila konkludon në respektimin e kufizimeve në lidhje me përmbytjet e paligjshme ose të dëmshme, sipas rregullimeve përkatëse ligjore në fuqi, në mënyrë të veçantë të:

- i) Kushteve të përcaktuara në nenin 15 të Ligjit Nr. 9918, datë 19.05.2008 “Për komunikimet në Republikën e Shqipërisë”, i ndryshuar si dhe aktet normative të dala në zbatim të tij, në mënyrë të veçantë të Rregullores Nr. 47, datë 26.10.2017 “Për Zbatimin e regjimit të Autorizimit të Përgjithshëm”.
2. Sipërmarrësi “Albanian Satellite Communications” sh.p.k, nuk është njoftuar në rrugë elektronike mbi Autorizimin e Inspektimit, pasi jemi në kushtet e Inspektimit Rastësor.
 3. Grupi i Inspektimit, pasi ka administruar dokumentacionin e kërkuar, sipas tematikës së përcaktuar në Autorizimin e Inspektimit, si dhe pasi ka inspektuar subjektin në vendin e ushtrimit të veprimtarisë, rezultoi se:

Nga sinjalizimet e marra në terren si dhe nga informacioni i publikuar në median online “Prapaskena.com”, pretendohet se është bllokuar aksesit nga Sipërmarrësi i Komunikimeve Elektronike “Albanian Satellite Communications” sh.p.k për përdoruesit e tij fundorë.

- <https://prapaskena.com/2024/06/16/mafiozi-tan-dulaku-blokon-mediat-kritike-me-tring-internet-perqjime-e-nderhyrje-ne-telefona-e-te-dhenat-kompiuterike-a-doveproje-tomi-i-akep-it/>

4. Nisur nga ky fakt i njohur publikisht, strukturat e AKEP realizuan një Inspektim Rastësor pranë Sipërmarrësit të Komunikimeve Elektronike “Albanian Satellite Communications” sh.p.k.

Fillimisht u kontrollua një përdorues fundor dhe më pas në distributorët e sipërmarrësit, aksesit internetit që ASC sh.p.k (Tring) kishte nga faqja web “Prapaskena.com”.

Tek Sipërmarrësi i Komunikimeve Elektronike “Albanian Satellite Communications” sh.p.k u evidentua fakti se plotësonte detyrimin ligjor mbi bllokimin e çdo faqe interneti me përmbajtje të paligjshme apo të dëmshme sipas udhëzimeve të institucioneve ligjzbatuese dhe vendimmarrëse, të përcjella nga institucioni i AKEP. Konkretisht Grupi i Inspektimit i AKEP evidentoi në dyqanin e këtij sipërmarrësi faqet www.bet365.com, homelandjustice.vs dhe albkanale.com më poshtë, të cilat rezultuan të bllokuara sipas njoftimeve të institucionit të AKEP, por në përfundim të matjeve të kryera, rezultoi se ky sipërmarrës kishte të bllokuar aksesin e internetit për faqen web Prapaskena.com.

5. Grupi Inspektimit të AKEP, gjatë inspektimit rastësor, ka të drejtë që, me vendim të ndërmjetëm, të marrë masa urgjente, kur:
 - *ka një dyshim të arsyeshëm që për shkelje të kërkesave ligjore mund të shkaktohet një dëm i menjëhershëm, i rëndë dhe i pariparueshëm i interesit publik, është e nevojshme kryerja e verifikimeve të mëtejshme dokumentare ose kryerja e ekzaminimeve apo testeve.*
6. Për sa më lart, bazuar në nenin 43 të ligjit 10433, datë 16.6.2011 “Për inspektimin në Republikën e Shqipërisë”, si dhe Rregulloren Nr.46, datë 27.10.2016 “Metodika e Inspektimit të Veprimtarisë së Sipërmarrësve të Rrjeteve dhe Shërbimeve të Komunikimeve Elektronike”, me qëllim garantimin e shërbimeve të duhura dhe të përshtatshme për çdo përdorues/pajtimtar në territorin e Republikës të Shqipërisë si dhe shmangia e çdo problematike të mundshme e cila mund të sjell kufizime në shërbimet e internetit, Grupi Inspektimit të AKEP mori masën urgjente kundrejt Sipërmarrësit të Komunikimeve Elektronike “Albanian Satellite Communications” sh.p.k që të realizojë menjëherë zhblokimin e faqes

web "Prapaskena.com" si dhe të çdo faqe tjetër të bllokuar, që nuk rezulton të jenë përcjellë nga institucioni AKEP.

7. Për realizimin e kësaj mase urgjente brenda afatit të përcaktuar Sipërmarrësi i Komunikimeve Elektronike "Albanian Satellite Communications" sh.p.k rekomandohet:
 - Të realizojë menjëherë dhe të njoftojë në institucionin e AKEP mbi zhbllokimin e faqes web "Prapaskena.com" si dhe të çdo faqe tjetër të bllokuar, të cilat nuk rezultojnë të jenë përcjellë nga institucioni i AKEP.
8. Në komunikimin elektronik (e-mail dt. 21.06.2024) Grupi Inspektimit njofton përfaqësuesin e sipërmarrësit "Albanian Satellite Communications" sh.p.k mbi vendimin e ndërmjetëm dt. 21.06.2024 si dhe procesverbalin e inspektimit nr. 35, date 21.06.2024.
9. Në datë 26.06.2024, me shkresën Nr. 1623/1 Prot. i AKEP, sipërmarrësi bazuar në legjislacionin në fuqi ka paraqitur ankim administrativ pranë Këshillit Drejtues të AKEP.
Konkretisht, në ankimin e tij sipërmarrësi "Albanian Satellite Communications" sh.p.k parashtron se:
 - Shoqëria ka vepruar në përputhje me ligjin dhe ka zbatuar ne kohë çdo udhëzim apo urdhëresë të ardhur nga AKEP.
 - Shoqëria nuk ka bere asnjë rast bllokimin e faqes "Prapaskena" për përdoruesit fundore. Kjo faqe web është e hapur dhe nuk ka qene e bllokuar. Dhe ne keto kushte masa urgjente marrë me vendimin e ndërmjetëm nga Grupi Inspektimit i AKEP nuk ekziston dhe ky vendim është i pazbatueshëm dhe si i tillë të konsiderohet nga KD e AKEP.

KËSHILLI DREJTUES I AKEP

Pasi mori në shqyrtim ankimin administrativ të sipërmarrësit Albanian Satellite Communications sh.p.k, paraqitur me shkresë nr.1623/1 prot., datë 26.06.2024 dhe shqyrtoi materialet pjesë përbërëse të dosjet së inspektimit, konstatimet dhe konkluzionet e arritura në përfundim të procesit të inspektimit,

ARSYETON:

11. Në zbatim dhe konform parashikimeve të Rregullores Nr. 46, datë 27.10.2016 "Metodika e Inspektimit të Veprimtarisë së Sipërmarrësve të Rrjeteve dhe të Shërbimeve të Komunikimeve Elektronike" Grupi i Inspektimit ka kryer veprimet procedurale duke zhvilluar procedurë inspektuese sipas përcaktimeve ligjore në fuqi.
12. Sa i takon shkeljeve të konstatuara gjatë verifikimit dhe procedurës inspektuese, vërehet se subjekti "Albanian Satellite Communications" sh.p.k gjatë veprimtarisë

së tij sipas Grupit të Inspektimit ka kryer shkelje të përcaktimeve të nenit 15 të Ligjit nr. 9918, i ndryshuar “Për Komunikimet Elektronike në Republikën e Shqipërisë” si dhe të Rregullores Nr. 47, datë 26.10.2017 “Për Zbatimin e Regjimit të Autorizimit të Përgjithshëm”.

10. AKEP pasi administron kërkesat nga organet ligjzbatuese me objekt bllokimi i faqeve web me përmbajtje të paligjshme, në zbatim të shkronjës e) të nenit 15 të Ligjit nr. 9918, i ndryshuar “Për Komunikimet Elektronike në Republikën e Shqipërisë” dhe bazuar në shkronjën e) të pikës 1 të Nenit 9 të Aneksit E) të Rregullores Nr. 47, datë 26.10.2017 “Për Zbatimin e regjimit të autorizimit të përgjithshëm”, njofton me shkresë zyrtare por edhe përmes postës elektronike sipërmarrësit e komunikimeve elektronike për të kryer veprimet e mbylljes së aksesit të faqeve elektronike.

Sipërmarrësi i Komunikimeve Elektronike “Albanian Satellite Communications” sh.p.k duhet të plotësojë detyrimin mbi bllokimin e çdo faqe interneti me përmbajtje të paligjshme apo të dëmshme vetëm sipas udhëzimeve të institucioneve ligjzbatuese dhe vendimmarrëse, të përcjella nga AKEP.

13. Gjatë procedurës inspektuese Grupi i Inspektimit, ka të drejtë që me vendim të ndërmjetëm, të marrë masa urgjente, kur:

- *ka një dyshim të arsyeshëm që për shkelje të kërkesave ligjore mund të shkaktohet një dëm i menjëhershëm, i rëndë dhe i pariparueshëm i interesit publik, është e nevojshme kryerja e verifikimeve të mëtejshme dokumentare ose kryerja e ekzaminimeve apo testeve.*

- Masat urgjente janë:

- ***Ndërprerja e kryerjes së një veprimi, veprimtarie apo një pjese të saj;***
- *Ndalimi i funksionimit të një instalimi rrjeti apo pajisje;*
- *Bllokimi i pajisjeve të pa autorizuara;*
- *Urdhri i subjektit të inspektimit të njoftojë të tretët apo publikun për rreziqet e mundshme;*
- *Çdo masë tjetër që vlerësohet e domosdoshme dhe proporcionale për të realizuar qëllimin e masës urgjente.*

14. Në përfundim të procedurës për shqyrtimin e ankimit dhe të pretendimeve të sipërmarrësit “Albanian Satellite Communications” sh.p.k, pas arsyetimeve dhe akteve të paraqitura nga Grupi i Inspektimit, si dhe nga analiza e plotë e çështjes objekt shqyrtimi, konstatohet se, vendimi i ndërmjetëm shihet si mase adekuate referuar situatës së evidentuar gjatë procedurës inspektuese. Masat urgjente merren deri në çastin e marrjes së vendimit përfundimtar nga Grupi i Inspektimit

Aktualisht, pas testimëve nga përfaqësuesi teknik i komisionit Ad Hoc, rezulton se faqja web parapaskena.com rezulton e hapur në rrjetin e sipërmarrësit “Albanian Satellite Communications” sh.p.k.

PËR KËTO ARSYE:

Bazuar në pikën 1 të nenit 114, në pikën 1 të nenit 115, të ligjit nr. 9918, datë 19.5.2008 “Për Komunikimet Elektronike në Republikën e Shqipërisë”, i ndryshuar, si dhe në zbatimin e nenit 128 e në vijim të Kodit të Procedurave Administrative të Republikës së Shqipërisë, Këshilli Drejtues i AKEP,

V E N D O S I:

1. Të mos pranohet ankimi administrativ të sipërmarrësit “Albanian Satellite Communications” sh.p.k.
2. Lënien në fuqi të vendimit të ndërmjetëm të Grupit të Inspektimit, datë 21.06.2024.
3. Të njoftohet sipërmarrësi “Albanian Satellite Communications” sh.p.k., për zbatimin e këtij vendimi.
4. Kundër këtij vendimi mund të bëhet ankim në Gjykatën Administrative të Shkallës së Parë, brenda afateve të përcaktuara në ligj.

Ky vendim hyn në fuqi menjëherë.

Kryetar

Anëtar

Anëtar

Anëtar

Anëtar

Tomi Frashëri

Edlira Dvorani

Lorenc Bako

Bleron Dokle

Armer Juka

